


NIHIKU N'AXIMAAMA

 ...etapernakulu, ti mavekelo aka. Tthiri kootteeliwa murima voosiis'ula, wona mukhalelo wa erooho wa etapernakulu ela, ni moota, nipawe vate vale, anitthokihaaya vano wira etekiwe ekereja esya. Kinoona wira ennitthunaneya. Ni wona nuumala...Pwiya Yesu apisa vale, nironwe-ene, anookhalana...an'ihu ahaana okhalana nipuro n'orowa okereja. Ni nintthuna "niwanele ni wiilipiha Waamini yaatonko ovahiwa athu ooreera murima." Kinoona wira eyo ethu yooreera.

² Ni okathi waavolowaaka, okathi vakhani ovinre, wira kaacererye myiha sinci-ene sa onamoona sihimmwe vanaasiwa ovonihiwa, sa mithukumano vakhani sookiserya, otapernakulu va. Awo kweekwe anoothukumanya, sa ovonihiwa, ovonihiwa wuulupale wa miiriirya.

³ Kihaahiya amwaar'aka, okathi ola, ni aana va—vamukhora; ni aahikhala munna mmosa muthiyana, aakilaanthe vale naanaano, oohakalala vanci-ene mpakha vaanlaawe, mwaha wa mwiiriirya muulupale wiiraneieye mwa mwamusulu awe, ohitto wu, wona waka, oChattanooga. Muhano Nash, nto, mwaamusulu anyu aahaaxeya ni eretta emosa, nto muthukumano wookiserya va, Pwiya Yesu, kookupali, khumwiihana, khwira, "SIISO ANIHIMYA T'APWIYA, wira, yoomala. Ni owo onrowa okhala mukumi." Nto mwammiravo ori oolikana saana ni mukumi, mukumi saana ntoko sikhanlyawe okhalaka.

Ni ti—ti yoohakalaliha, wiiwa onamoona ola.

⁴ Ni nto mmiravo mmosa, ori vaava nave, aahinkelela nivekelo Muhano Stotts, onammala-ru wooperariwa. Ni ocaliwa waya; moone, ahaakhanle mutthu aatthuna wira naavekelele, xeeni yawaya...enooniherya wira, vakhalaru wira munneehererya, athu atthunaka wira avekeleliwe, nto awo, ocaliwa, moone. Imaara sikina ennikhala yootepa, mpakha...kahi yootepaxa, masi anci-ene, mpakha murinaanyu otthyawelaka nipuro khata ni orowa ottaiwene, ni wiipitha vakhani, wira mukhale. Masi, miyo—miyo kinootteliwa murima awo wira yeeyo. Muhikhalakhale muupuwelaka wira khonkisivela owoona, okhala wira awo...ahaakhanle hata mutthu aatthuna wira kaavekelele, muteko aka waarowa okhala yayi? Munnona? Munnona?

⁵ Masi imaara sikina mwaairaka, "Munna Branham, miyo nkinsuwela saana athu yaaithanaka siiso, nto—nto nyuwo munahuluwela nipuro nlo." Kihaana wira yeeyo wira kikhaleke, wira kaavekeleleke athu. Nyuwo paahi khamu...Khanihyo—

khanihiyo nipuro nimoso paahi, nno. Mulaponi mothene. Munnona? Ni—ni ti yoolipa saana. Ni kookupali wira nyuwo munnisuwela saana yeeyo.

⁶ Oh, ti yooreera saana okhala muKristu! Nkisuwenle etthu kaarowaaka wira wahaakhanle mwaha wa Kristu, nto vano. . . ni okhalana opathana n'aKristu, wira, atthu a Waamini omosaru wooreeraxa, animwaamini Muluku ni animuroromela Yoowo; ni yaaminiki wira nihiku nlo noovuwaxa ninookhala vasulu va ewanelo ela yothene, ni okhalana oxintta, ni ninookhala oovuluxiwa oolikana ni Yoowo, epantte ekina.

⁷ Vano nto kaatthuna kihimye paahi muhupi wowaakuveya, wira, orwa wa etapernakulu, ni sikina, miyo. . .hiyo nimpakatho mutthenkeso ahu, vanci-enexa mpantte aka wa ikampaanya. Moovirani mwa mithukumano, okhuma okathi opacenryaka mwa yeela, mpantte wa onamalaleya, miyaakha sinci-ene sivinre, ohiya okhalana mutthenkeso, okhalana nikhuru nikina n'atthu, miyo kirumeenle paahi nikhuru kaasuwelaaka; ni okhuma. . .khupaka mutthenkeso, wira mithukumano saka sothene saarowa weettiheriwaka vathi va nsina na Branham Tabernacle. Ni nlo naarowa orumeeliwa oUnion Nationa Bank oNew Albany, weiwo misurukhu saakhanlyaya olinvwaka—olinvwaka ovira mwa yeeyo, yahaarowaaya olivihiwa mpoosito. Kahiirale siiso, musurukhu wothene waarowa waakheliwa kaarowa olivihiwaka mpoosito miyo, kaahaarumeenle-ru Branham Tabernacle ntoko mutthenkeso.

⁸ Anci-ene a nyuwo mookiwa ohimya yeeyo, okathi p'ukathi. Kihaana wira, ni o. . .wira kiire yeeyo. Vano nto—nto hiyo ninkhaliha mutthenkeso musya vano. Ni naatthuna anci-ene anuwela wira miyo. . .Akavi atonko okiwa kihimya yeeyo, wira misokho sothene sa musurukhu, kinvara muteko kirumeelaka Branham Tabernacle? Nvenxe matata paahi, othene. . . Vekeekhai, othene anyu. Ti yeeyo tu.

⁹ Vano nto muteko wo okokhorela wamala, mwatthuna vale, kookhalana nuulumo nimoso naamukhaani vale, wira nto nyuwo, mwatthuna olepa mwaakhumaka. Munna Roy Roberson onookhalana ottuli iwe.

¹⁰ Okhala wira, ninrowa okhaliha mutthenkeso mukina, etthu emosaru, paahi. . .masi mutthenkeso mukina, wira misurukhu sahu sothene ni itthu, sinkumihiwa vamuthukumanoni, sihilivihiweke mpoosito, enrowa okhala. . .simpwehiwa, ntoko kweekwe, oUnion National Bank, wira sivareliweke muteko erumeeliwaka etapernakulu, ohiya okhalana mu—mu. . . mutthenkeso mukina. Okhala wira, ola mutthenkeso, mwa nsina na Tapernakulu Branham, moone. Nto vano ookhala Branham mmosa *va* ni Branham mmosa *iwe*, ni siisa, ni mitthenkeso soohiyana-hiyana khasinweheya saana.

¹¹ Munna Roberson onookhapelela yeeyo, nyuwo munthuna, naakhumaka. Hiyo ninooxukhurela.

¹² Vano, voosiis'ula, nihinatthi okela mmutekoni, kaathuna ohimya wira, Apwiya yatthuna vale, wira kinoophavela otthikatho ohiy'ula. Khonkisivela okuxa mithukumano soomiili sa Munna Neville, masi owo ookivekela ni ereerelo murima vanci-ene wira kilavule-tho ohiy'ula. Nto Apwiya yatthuna vale, kintthuna kilavule ohiy'ula mwaha wa onamalaleya, oniitthaniwa so: *Tani Ula?* Munnona? *Tani Ula?*

¹³ Nto siiso voosiis'ula, kintthuna o...Miyo kaamuupuwela o—olavula voosiis'ula mwaha wa Nihiku n'Aximaama. Ni koosuwela wira oxekuw'ola ni voosiisu waari wooheliwa ni ipokrama sa Nihiku n'Aximaama. Nto miyo kuupuwela wiiraaniha etthu, okhala wira ninthuna naavekelele aretta naanaanoru omalaka-ru muteko ola w'okokhorela, ntoko kweekwe.

¹⁴ Hiyo ninnaamini wira Muluku ti Mpenuxa, ni Owo onnaapenuxa aretta n'ale ooxanka. Ni miyo koosuwela wira Owo onniira yeeyo. Ni eri yoovikana khula—khula ohoverya, okhala wira khoreere onamoona woothukumanyiwa, mpakha ninsuwelaahu yeeyo.

¹⁵ Nsana kaaweha mmurupani Munna Gene ni Leo apwehanse aya sa onamoona awo aphwannye aya. Ni waari murupa muulupale woosareya sa ovonhiwa sa mwiiriirya soosuwanyeya Apwiya aniwiirelaaya atthu.

¹⁶ Nto miyo kuupuwela, eyo yakhala siiso, ankhhi hiyo naasunke sothene sikhumelenle? Miyo kinoona wira, oPorto Rico ni oJamaica, meekhaaya, yaamukhala ikonto muloko, wala soovikana, sa onamoona soosuwanyeya, wa ovoniha w'Apwiya, Awo yiiraly'aya.

Vano nihinatthi okhunla Eliivuru, nrowe nilavule ni Mwaneene.

¹⁷ Pwiya, hiyo khanireere wooxukhuruni Nyuwo, ekhanle siiso, nuuramihaka miru sahu, ninnikukuma paahi niphavelaka moolumo wira nihimye; maana miyo nkinaamini wira eri muyanoni mwa mutthu ohimya miyoonelo sa murima wa mulopwana wala muthiyana, mmiravo wala mwaaruusi, otonko okumana ni Nyuwo. Wira nihimye okokhorela wahu, wa moota onookokhorelaahuni Nyuwo, ni etthu Nyuwo mukhanlyanyu wa hiyo. Eyo yoonivalaaniha ni etampi, ni yoonivalaaniha ni olumwenku. Ni enninivaha etthu ekhanle Yoohimala ni yooreerihwa. Ni khinaakhanle ophwanyaka moolumo oophiyerya.

¹⁸ Ntoko etonko aya ohimmwa ni mulopwana mmosa oosuwanyeya, isumana vakhani sivinre, wira aaniwerya olavula oraatteene mattaava oophiyaka mathanu na maxexe oovirikana, ovaraka muteko awe ni namanvaha miruku Mukhulupale ahu

ophenteya Dwight Eisenhower. Ni onaamwi aweryaka olavula mattaava mathanu na maxexe, oratteene, owo iirale, okathi owo aakhenlyawe Erooho Yoowaarya, owo aaheererya mathanu na maxexe othene, ni khinaakhanle hata nuulumo aaweryawe ophwanya, hat'etthu aakhanlyawe ohimyaka, nto siiso Nyuwo khunvaha nntaava nsya wira ahimye ni wira ooxukhuruni Nyuwo ni nenlo. Ni hiyo ninooona siiso, nave, Pwiya, wira, ekumi yamala vale, wira khino ninrowa olavula othene nntaava nimosa noovirikana, wira niwerye ohimya ele eniwuupuwelelaahuni Nyuwo.

¹⁹ Vano hiyo ninnivekela, Pwiya, wira Nyuwo mureerihe etapernakulu ila, pastore aya, maatiministratoore aya, matiyaakono aya, axirikha aya a muteko othene, atthu anthotola va, anvolowa ni ankhuma mikhora iya. Kweekwe ephwanyaweke ntoko evahereriwaaya, ntthyawelo n'omumulavo, vaavo ale oowoceya akhanlyaya ovolowaka, mikhora saya ni ophwanya omumula ni murettele wa munepa aya, ni wira aretta avolowe vamukhora, n'ukhuma oopenuwa, mwaha wa Mukhalelo mukumi wa okathi wothe ne wa Muluku Oowerya sothene Ole onkhala vathi va nipatho naya.

²⁰ Hiyo ninnivekela, Pwiya, wira muhina wa prokrama ola onrwa a . . . ompakiwa vano, wira Nyuwo mukumane nnikhuru ni mukumane ni othene. Ni wira ela yoosivelihakani okhale otthapela woohihyererya wa nivekelo niiriwe vantthiyani va na khalayi, ni nipuro na malaxi oonanara, nihiku nimosa; nenlo nikhanel eforora vano, nipuro n'omumula na ole oowoceya, mwaha wo waakhuliwa wa nivekelo nlo.

²¹ Vano munilevelele khula etthu niiralyahu, wala nihimye ahu, wala nuupuwenlyahu, yaari yoovirikana n'utthuna Wanyu wuulupale; ni muupuwele, Pwiya, eyo khekhumme mmurimani mwahu. Khino hiyo noonihenrye eyo paahi mwa yoowiira ahu wala muyanoni mwahu. Masi, naanaanoru, Nyuwo tthiri mooniwa. Voonalyahu wira naahivonya, naahithuna olapa. Ni hiyo khaninthuna ovarela eyo mmurimani mwahu, sootakhala, vano noosuwela wira Muluku khonrowa waakhula mavekelo ahu; masi voohihyererya nilapaka soovonya sahu.

²² Ni ninvekela Pwiya, wira Nyuwo mureerihe, voosiis'ula, mulaponi mothene, okathi nintthapeliwaya nihiku nla na muupuxeryo wa Nihiku n'Aximaama. Masi nla nihikhale paahi ni—nihiku n'ximaama; mahiku othene akhaleke siiso.

²³ Muluku, munivahe voosiis'ula, wira aximaama, athiyana, amusunse Muluku, yitthikele mmansaya, voosiis'ula, ni asuwele ele enihimya nuulumo *maama*, "ole oyanre." Owo asuwele wira aana, a ophitaana wawe ni aiy'awe, annikhalaka maluku oowaarya makhaani ni ooreerihiwa Muluku ohenlyawe wira okhapeleleke. Vano, Muluku onoomukhalaha oowaakhula mwaha w'anamwane awo. Ni ntoko Yoolempwa enihimyaaya,

wira, “Muthiyana ooreera murima, ni maama, ele okhanly’awe, an’awe anrowa omwiihana oottotopeliwa.”

²⁴ O Pwiya, noonaka nihiku nla, awo yaairakamelihaka vanci-ene Soolempwa, ni wira voo halela okhala ntoko axinama! Hiyo ninnivekela, Muluku, wira munivahe muhakalaliho wa enamuna ya khalayi wira owiithanele nipuro yaatthuneyaaya okhala.

²⁵ Pwiya, hiyo khinaarowa, nnakhala, oliyala wooxukhuruni Nyuwo mwaha wa aximaama eekeekhai, okhala wira noosuwela wira nookhalana yaawo olelo; aximaama eekeekhai ooloka. Muluku, mwaareerihe. Awo ti mihakhu suulupale wa hiyo, ni ninvekela wira Nyuwo mutthikele mukhalaka ni yaawo, Pwiya, ni wira awo akhaleke ootthapa ni yoone muhokorokho wa mmirimani mwaya omurumeelaka Muluku.

²⁶ Ni hiyo ninnivekela, Muluku, wira ale awanre ethutu yootteela voosiis’ula, wala nluwa nootteela, ehimyaka wira amama aya aavira epanthe ekina wa mukhalelo wa yoo wiira olelo; awo, Pwiya Muluku, awo amumuleke ni murettele ni miteko saya saatthare. Munivahe, Pwiya.

²⁷ Vano mukuxe Masu Anyu, Pwiya, mwaaleele atthu, ni mwaavahe okurunuxiwa murima, okhala wira nla ti niwoko nithukumanenlyahu va; wira noone Mukhalelo Anyu, wiiwa Masu Anyu, ni okhala ooreerihwa; ni okhuma va wira nikhale alopwana ooreera murima n’athiyana, amiravo n’axiruusi, ovikana saaryahu nivolowaka. Hiyo ninvekela yeela mwa Nsina na Yesu, Mwaana a Muluku. Amen.

²⁸ Miyo okisivela osommwa wa Masu Awe ooreerihwa. Nto vano ninrowa okhunla, voosiis’ula, Multiivuruni mwa aKorinto Oopacerya, nisome nipuro nimosa na kapiitulu 15, opacerya versiikulu 1.

Nave-tho, axinna, kinoohimeeryani ehapari yooreera yoolaleenryaakani, yeeyo-tho nyuwo yaakhenle-anyu, nave yeeyo-tho nyuwo munkhalelaanyu nthiti;

Mwa yeeyo-tho nyuwo munnoopowa, mweettelaka-ru ntoko siisaale soolaleenryaakani, vaahikhale-ru wira mwaaminni mahala-ene.

Okhala wira opacerya wene miyo kihoovahereryani yeeyo-tho yaakhenle-aka wira, Kristu okhwenle itampi sahu ntoko silempwaaya;

Ni wira owo aahivithiwa, ni khuhihimuwa mmurotoni mwaya ntoko silempwaaya;

²⁹ Nyuwo pooti wira, “Munna Branham, eyo yoosoma yoohilimaleleya wa mutthaka wa Nihiku n’Aximaama.” Ahe, eyo eekeekhai. Masi, moosuwela, Muluku t’ohilimaleleya, ni Owo oniira itthu mwa enamuna yoohilimaleleya.

³⁰ Ni miyo kinnuupuwela, miyuupuwelo, sa maama. Ni kookhalana mmosa voosiis’ula, ni mahala a Muluku, nlelo elapo

ya vathi ni hiyo. Ni miyo kinnixukhuru mwaha wa maama. Masi okhalaka wira naahaana okhalana, nave-tho, muteko wo ovoniha, ni nihisuwelaka wira kaamutthika-tho ohiy'ula, masi miyo kihupuwela wira khino naamuwerya opintari enamuna ekina ya elatarato.

³¹ Maama t'owunnuwaxa. Nyuwo moosuwela, ole onipacerya owaakhelani, mwa ekumi ela, ti maama anyu. Khaavo onwerya wookwannanyi, okhala wira muroorupaliwa, owo onimookuxani vathi va murima awe. Ni owo t'ompacerya woosuwelani, ni oopacerya wo, mwa ekumi ela, wo—woovarelani. Vano, vaniyariwaanyu, owo ti mmosa wa matata oopacerya anookwannanyi ni okukuttha maithori mmaithoni mwanyu. Owo t'ompacerya wookwatani ni woophentani, ni olavula voomaaleleya ni nyuwo, mwa ekumi ela, maama anyu. Vano, kinoona wira khokhanle nttittimiho woophiyerya naakhanle-ahu onvahaka maama.

³² Maama t'onkhala oopacerya ni mwaana, ni owo t'onkhala othokorerya wuulupale wa ele mwaan'owo onrowaawe okhala, enrowa olipihereya moota maama owo onimpacerihaawe mwaan'owo ephiro orinaawe ottharaka. Maama ookhalana othokorerya, wa Muluku, wo omuhela mwaan'owo ephiro yooloka. Ni kinoona wira mwaha wa yeeyo aximaama arinaaya enamuna yaamukhaani y'omeekha.

³³ Miyo kinnimusuwela mmiravo mmosa epooma ela. Kinoona wira ame awe ari vaava naanaano va. Awo arina ntoko munnuwelo aka. Masi nkinihimya ela wira kimusikulihe maama owo; okhala wira owo ohiiniwa murima voophiyerya, ntoko aximaama othene. Masi mmiravo owo onniwurya, ni khonreere owurya. Ni owo ahapaliwa vanci-ene, onoophiya owaani ni otuphela voolilini n'ame awe ni waapweherya miyoono sawe. Ni ookhalana axisulu. Masi yookhala etthu y'omeekha mwa opepesa wa maama, eyo enkhala ntoko oroiha vo—voopuroni voovirikana ehikhanlaaya ekina enwerya okwannya; eyo ti wii, mwa ekumi ela, olavula wa omutthu.

³⁴ Moosuwela, mutthu ntoko Moise, owo...Kaawerya ovaha etthu mukhalelo wa murima awe, waari mwaha wo wira aarina maama ooveleelihiwa ni Muluku. Moosuwela wira aari yoowo aavekenle, Yokepeti, ni aanimulipelela mwaan'ola. Ni vayariwaawe, aari yoowo aalavulana voomaaleleya, ni aamukhupaara ni khuteka nivuku khimuhela muttheereni, murima awe oryeene wooriipiwa. Mwan'awe mmosa-ene mwamulopwana, ni aari e—etthu yoosuwanyeyaxa molumwenkuni mothene. Ni moota maama onimusivelaawe khula mwaana! Masi vamoonyawo mwaapar'ola mwaamukhaani oomeekha!

³⁵ Vano nto, mmurimani mwawe, owo aahisuwela wira aayareliwe niwoko khata, vano nto omukuxa omuhela

nipuro nene na ikonya, omuratthini wu. Mwaha wo waamini owo aahiira yeeyo, asuwelaka wira Muluku aaniwerya omukhapelela; ni mwa moolumo vakhani ophenta wa maama, ni mwiirelo wa mukhalelo wo waamini wawe. Okhala wira waamini khoniilipiherya vasulu va mithaaka sinkomowa sa ethu enwerya wooniwa; waamini ommumula ni nttittimiho vasulu va mwala ohinttikinyeya wa Masu a Muluku Ahinimala. “Maana mwaha wo waamini,” enihimya Yoolempwa, “owo aahiira yeela.”

³⁶ Ni waamini onniwerya wiilipiherya vamwala, vaavo mawipi ammanaaya vathi vaya, ni onniweha wiitho wene wa okhwa ni osuwela wira ela enrowa okhala vakhani paahi, masi waamini onniwerya oweha ovira mphareya wa Ole ohimnye wira, “Miyo ki ohihimuwa ni Ekumi,” ni onnihiya hata wiiwa mawipi emanaka.

³⁷ Eyo ti enamuna ya waamini ame awe Moise yaarinaaya. Awo yaamwiixuttinhe ni yaamulenle mpaani ya omwene ya Farawo, emwiixuttihaka wira aayareliwe niwoko khata, wira Yehova aahaakhula mavekelo aya. Ni, owo. . .owo khaakhanle okhalanaka musomiha ooloka. Ti yeeyo yaamukhalihenrye opaka mukhalelo wa murima Moise aarinaawe.

³⁸ Kookupali wira aari Abraham Lincoln yoowo aatonko ohimya nuulumu ntoko nla. . .

³⁹ Vano, miyo nkihiyo Temokrata wala Repuplikaano, miyo paahi. . .Miyo ka muKristu. Maana, kinoona wira epantte emosa khiyaakhanle ohimyanaka ethu ya nthowa epantte ekina; sothene ti sohononeya. Masi, Abraham Lincoln, mwa miyuupuwelo saka, aari mmosa a. . .ni aari mmosa a Makhulupale aalupale Estadu Unidu ula otonko awe okhalana; vamosa ni Washington, n'akina.

⁴⁰ Maana, Abraham Lincoln aarina m—mpaceryo woohiloka. Owo aari oohaawa. Owo khaarina osoma woolipa, ntoko elimalelo, wala—wala ethu yuulupale, wala musurukhu, wala ethu emosa yaakhanle omukhaliheryaka, ntoko Washington saarinaawe. Washington aahiphwanya ekharawu okolexiyu, ni owo—owo aanisuwela; owo aari mutthu oosuwela, mutthu muulupale, opacerya wene. Masi Lincoln aaleliwe mmuxaaxani mwaamukhaani wa matoro, ilapo suulupale sa oKentucky, ni oohikhalana evuwelo mmuxaaxani mwaamukhaani wa khalayi, yoowo omphwanyaneya ntoko muupuxeryo nno oLouisville vano. Masi, oryeene mutthu muulupale saaryaawe, ni aahaana wiixutta olepa, vatthayani owo aalimaawe, wira amwaale nakuwo.

⁴¹ Masi kinimwaaleeliherya ela amiravo. Moosuwela wira Abraham Lincoln khonakhalaneke eliivuru ookhalaru, mpakha waaphiyalyawe miyaakha miloko miili ni mmosa, woohikhala Bibilia ni eliivuru y'anamakhwela waamini Foxe? Moone,

ensomaanyu t'empaka mukhalelo wa murima orinaanyu. Khivanxankiha hiyo okhalanaka nikhuru n'anamukhwanepa olelo; irevista ni ethepyelo, ni itthu soonanara s'ethiru, siniheliwa mootumihani mwahu wa ipaphelo sa ihapari. Owo aarina Bibilia ni eliivuru ya anamakhwela waamini ya Foxe. Nkawehani etthu yaamukhalinhe-aya!

⁴² Masi ohoolo wa sothene iyo, nihiku nimosa owo aahihimya nuulumo ntoko nla. Owo iirale, "Vaaweryaneyaka ophwanyiwa etthu yooreera mwa miyo, mwaha wa maama ooreera murima," aamulenle wira aarumeele Apwiya.

⁴³ Moone, mwaana oniwiiwelela ame awe; maama ole ookhalana enamuna yaamukhaani, enimwiiriha mwaana wiiwa. Avulala vale, owo onrowa wa maama wira akurunuxiwe murima ohinatthi orowa wa tiithi. Okhala wira, owo aari oopacerya ni yoowo, moosuwela. Ni yookhala yoovaha Muluku oninvahaawe maama, wira akhale siisaale; kinimuhimya maama eekeekhai. Vano, kinnaamini wira aximaama t'a nttittimiho ni ooreera murima.

⁴⁴ Masi kinnaamini, siiso ntoko Nihiku n'Aximaama, ntoko nla, ti na nakoso, amphwanya musurukhu munci-ene mwaha wa maluwa ni itthu. Masi nihiku n'aximaama naahaana okhala khula nihiku. Kahi omuroihela nikuttha na maluwa Nihiku n'Aximaama, masi omphenta ni omukhapelela mahiku imiya ttharu ni miloko mithanu na mosa ni mahiku mathanu othana n'uhiyu, mwa eyaakha. Masi, tthiri, olumwenku wa nakoso onvaraxa itthu ntoko seiya, ni eyo—eyo—eyo ennimuyeviha maama.

"Oh, ahe, Nihiku n'Aximaama nookiserya miyo kaahaaveleeliherya nikuttha na maluwa."

⁴⁵ Owo aamuxukhurela, vanci-enexa, okilaathi paahi ni yoowo vakhani, omulepela eliinya emosa, ommana vanikhatani, ompecari wiitho, omuleela wira nyuwo munnimphenta. Eyo enoorowaxa ovikana maluwa othene mwaakhanlyanyu othumaka nipuro nintumihwiwa maluwa. Eyo ekeekhaii.

⁴⁶ Kookupali wira waari mwa Sooruma Muloko, sa Cecil DeMille okhwiye, olempe ni khuhela muteelani mmosa wa miteko suulupale sa olumwenku wa sineema. Ni ehinatthi wooniheriwa muteelani, wala okumihwiwa, Cecil DeMille aahimwiitthana Oral Roberts ni Demos Shakarian, ni nikhuru na arumeyi a Ehapari yooreera Yoomalela, khwaarowana mustuutiyu mwawe khuwooniha iwoora xexe sa Sooruma Muloko, ni khwaakoha muupuwelo aya wa yeeyo. Muluku iitthyuuwihe munepa awe woominyala!

⁴⁷ Ni okathi woonalyaka, kaamuweha, nto muupuwelo mukhaani khukhala wookhumela wa miyo. Vakhala wira anci-ene a nyuwo moonne, waari okathi mwaana a Farawo. . . vaamanly'awe Moise osuwela wira owo aari mu—muHeperi, ni

owo aahilakela orowa okhala n'atthu awe. Nto vale yaakilaanthe ale yaari ame awe ooreera murima, oottweelela, ni maihi aya oottweelela ni wiitho waya wa mannyaari, akilaanthe-ene vakhaterani ya khalayi; maama oophwanelela. Vano mwaana muthiyana a Farawo khuvolowa. Nto owo khwira, "Miyo ka mwaana awani, kiireke?"

⁴⁸ Nto varuuiwaaya voowooneya, Yokepeti ole aari maama awe eekeekhai. Mwaana muthiyana a Farawo, ni wiipintari wawe ni sikina, ni sothene sootthokihwiwa; owo iirale, "Masi, nwehe! Owo pooti okhala mwan'inyu, masi," owo khwira, "Miyo kininvaha muhaku ni eyaaryelo. Khimwaarowa owerya omuvaha etthu woohikhala malitti a marove."

⁴⁹ Masi maama ole oowuuluvala a maihi oottweelela khwira, "Masi koomuvaha ekumi." Eyo ennivirikana. "Miyo koomuvaha ekumi." Muluku oomuvaha Ekumi Ehinimala. Ekeekhai xeeni, maama!

⁵⁰ Imaara sikina atthu annikiirela, okathi wothene mukampaanyani mwaka, wira "kweekwe kinlaleya ohihimuwa." Ni koosoma yoosoma voosis'ula, kapiitulu 15 versiikulu 4 ya aKorinto Oopacerya, mwaha wa ohihimuwa.

⁵¹ Masi, moone, moota awo animuhelaaya maama olelo, ti mwaapu wa maluwa opwehiwe epantte ya muhano mutokweene, uuluvanle ni ohinwerya ovenya, khino, ni ootteettheya, ni maihi oottweelela, ni a mannyaari, okilaanthe-ene vakhaterani. Eyo ekeekhaii voolikana. Masi kintthuna kikuxe mwaha aka koopakeleni eletarato ekina ya ele okhanle maama.

⁵² Ookhala mutthu iirale, "Nyuwo khamunreere olaleya sa ohihimuwa. Khula Mutthaka wookhalana etthu enihimya ohihimuwa."

⁵³ Vano, vekeekhai. Ti—ti nipuro n'omumula noopacerya na Ehapari yooreera. Voohicala etthu Owo iiraly'awe, vakhala wira Owo khohihimunwe mw'alipa-ookhwa, weeso sothene iyo saari mahala-ene. Eyo, wa miyo, enooniherya wira Owo aari Muluku. Enlipiherya khula yoohimya Owo ohimalyawe; ohihimuwa! Ni nave-tho nlo nipuro n'omumula wa munepa. Nlo ti nipuro noopacerya-vo. Ti ekhara ya okurunuxiwa wahu murima.

⁵⁴ Ni noonaka wira Owo oohihimuwa mw'alipa-ookhwa, eyo enninihela, ni ikaruma sa Ehapari yooreera, ohoolo wa ekhotto, wira nikuxe opuro, wira niwane. Tthiri, hiyo noosuwela wira Owo oohimya, "Ole ompweteiwa ekumi awe mwaha wa Miyo onophwanya-tho."

⁵⁵ Ni kinoona wira eyo ti owarihiwa ekhara wuulupale ya Ehapari yooreera Yoomalela, ti ohihimuwa, ni anatiri aya a oMuluku, ni okurunuxiwa murima anvahiwa ale anroromela yeela. Maana, eyo enlaiherya wiiraana wuulupale wo othukumana wahu emaara ekina. Eyo ennilaiherya, ni o—omalalama wa etampi yothene. Ennilaiherya omalamala wa

ohononeya wothene, ihaawelo sothene siviralyaahu mwa yeela, naarinaahu ovira-mo, mwa makhalelo ala. Eyo ennilaiherya, ni olakaseya wa sothene iya. Ennilaiherya wira hata okhwa onoopweteiwa ikuru saya, ni ninoovenya nilikanaka ni Yesu. Tivo, mwa muupuwelo aka, ohihimuwa ti wuulupalexa wa anatiri othene mwa itthu sa Soolempwa. Ti vaavo eyo etthittale-aya.

⁵⁶ Nto Paasikha ookiserya, okathi waalaleyaaka sa itthu thanu sa:

Akhhalaka, Owo ookiphenta; akhwaaka, Owo
 ookoopola;
 Avithiwaka, Owo ooroiha itampi saka
 ottaiwene;
 Masi, ahihimuwaka, Owo ookhaliha naxariya
 mahala-ene voohimala.

⁵⁷ Nlo ti Nihiku wa miyo, Nihiku nle nuulupale na mahiku! Ni woona etthu enrowaaya ohimya, wa hiyo othene, woohihimuwani, okathi onvaraahu muteko nilipelelaka Nihiku nle nooreerihwa na mahiku!

⁵⁸ Ela enninivaha natiri wira nihiku nlo wira aximaama ala oowuuluvala, ootteettheya, oowoceya, a maihi oottweelela, oomalamala anorowa orukunxiwa. Kahi wira paahi amaama anrowa okilaathi vale, mmansaya, masi amusi aya othene ni yaawo.

⁵⁹ Nto nihiku xeeni ninrowa okhala nlo! Okathi xeeni onrowa okhala owo, naweha-ru wiitho w'ale nihireera-ahu waaphenta! Evirikanelo xeeni voosis'ule, nawoona-ru oophentiwa ahu, ni—ni oweha etthu anrowaaya okhala okathi owo! Mixankiho sothene sinoorowa okumihwa. Ihononeyelo sothene ohaawa oniruuhaaya sinoomala. Ohikhala-tho wiitho woottweelela wa mokhwaani. Ohikhala-tho maithori mmaithoni. Ohihimuwa onnilaiherya sothene iya. Khasinrowa-tho okhala miteko so ovitha. Ohikhala-tho ommana ttuutthu witho, onkhala ntoko nipattuuxa na nluku; vaavo mulipa a miteko soovitha uumihalyawe ni murette, ni khuhela vate khoottiha soowunkhela, ni siiso, wira yooneyeke ntoko y'ephattu. Khenrowa-tho otthunaneya, iwe.

⁶⁰ Nto kinnuupuwela nawoona-ru awo yeemenle-ene iwe, oophentiwa ahu, aximaama ahu, amusi ahu, apatthani ahu othene; ni owoona mw'erutthuni mwaya sihinkhwa, irutthu saya sa wirimu; niwehaka mukhalelo aya, noonaka moota awo aniiseettihaaya ni esivelo ele ni wiisumaaliha, ohikhala-tho onanariwa ni ithepyelo. Owoona nto yeemenle oolikana ni Pwiya Yesu, nle ninrowa okhala nihiku nooreeraxa.

⁶¹ Ni khula mmosa a hiyo, mmuupuweloni mwahu, ninnitthunaxa ni olipelela okathi yoowo w'okurunuxiwa murima, onrowaahu okumana ni yaawo. Khula mmosa

oniwuupuwela oophentiwa awe, khino ame awe aronwe. Nto nihiku xeeni ninrowa okhala, okathi onrowaanyu owoonatho! Ni wa tiithi, ni wa munna, ni wa e . . . oophentiwa othene, nihiku xeeni ninrowa okhala!

⁶² Kinnuupuwela, nave, naanaano va. Kiniwuupuwela amusi aka, etthu enrowaaya ohimya wa miyo Nihiku nle.

⁶³ Kinnuupuwela wira, voosiis'ule wa ohihimuwa, khino oopacerya onrowa orwa okumana ni miyo onrowa okhala Sharon aka mwaamukhaani. Nnari, owo khonrowa othukumelaka. Xetwani uwo khonwerya ovolowa nipuro nle. Khiyaavo minixiite enwerya okwannya Elapo ele. Owo khonrowa ottikinya ntata akiirelaka kwaherini. Maitho ale makhaani, ooripelela anrowa wiinaka owo ookola-ru matata awe ni okhuwela, "Paapa!" Kinootteeliwa murima omoona, osuwela wira khonkhalakhala-tho akhwaaka; osuwela wira sothene iya soomala, mwaha kihinreere aka olaleya ohihimuwa.

⁶⁴ Vano kinoowoona ame awe, ame awe Billy, mmiravo aka. Ni kihaana miyuupuxeryo sinci-ene sa yeeyo nlelo sinikhala. Kinnuupuwela okathi waamukuxaaka; ahiiso Mwenye Combs, osulu nno, waamukuxaawe orwa weettakasa wookiserya, nto miyo kaammuthhara, mukaaroni. Okathi waakhuruwelaahu Ephiro ya Neethanu n'eili, vaavale vene; Billy, orineene miyeeri muloko ni mithanu na miraru.

⁶⁵ Moota aaruhiwaawe mphironi, khuhiiwa omoona owo. Ni awo yimmaathale yinlaka, ni omoona mwan'aya, masi khiyaakhanle omwaattamelaka.

⁶⁶ Vano nto mphironi, mulipa a miteko s'ovitha khurwa khukhuruwela e—Ephiro Yaneethanu n'eili. Amaama va ti yaamukhapelela okathi ule. Ni owo aarimweemela vate vapuwani, onwanre-ene kaputtula mwaamukhaani, ni exapheyo ekhaani yooxeerya othetemanihenrye epante emosa mmuruni mwawe. Nto okathi maama ole, ommaathale-ene vanrepani vale, ottuli w'ampulansiya ole, akiwehaka, vamoonalayawe mwan'awe eemenle-ene vapuwani, asuwelaka wira waari weettakasa wawe wookiserya, aahivenya vanrepani khukhuwela, khookola ntata nawe makhuva-ru, wira ompatikhe mwan'awe vaniyateni. Masi owo khaakhanle onvarelaka.

⁶⁷ Oh, onrowa okhala ohakalala omoona nihiku nlo. Nnari, owo khonrowa okhalana matata ari makhuva-ru, nnakhala wiitho iwe khonrowa ophooteya. Masi onrowa weemela ni oreera wa wirimu wa pwiyamwene a Wirimu, ni wa maama. Maitho awe ooriipa, ooriipaxa ntoko mapupha a nakhuku, anrowa wiinaka mwaha wo ohakalala. Owo khonrowa okhala othene oowuurama; weiwo, xetwani ule a elapaha ohinrowaaawe nnakhala okela Muttetth'ole. Masi, oohikhwa, onrowa okhala oolattana ni Yoowo.

⁶⁸ Miyo kinoona wira, nto, onrowa ottharela orwa okumana ni miyo onrowa okhala Edward, namwiitthanakaahu “Humphy,” ntoko nsina nookiserya. Owo aari oopacerya nikwicili nuulupale na malutte mathanu na maxexe, nikwicili na emusi Branham. Owo aari nlutte noopacerya okwaseya; ole aakitthanre miyo. Kinoomoona Edward orwa okitthimakelaka. Nnya, owo okhwiye ntoko mmiravo, a miyaakha muloko ni mithanu na mixexe. Nto kanvara-ru ntata, kookupali wira ninookhalana ithu soowaatta s’olavula, sa emiravo, okhala wira naari apatthani a vatthirima. Khinaavalaaniheya. Owo aanikitthuniherya owara efaato awe, ni—ni—ni ithu, ntoko axinna eekeekhai yirakaaya. Enrowa okhala yooreera omoona-tho.

⁶⁹ Ni kinoorowa omwiiwa owo ohimya etthu sa, “Mwaahaakhela muhupi aka, Bill? Nyuwo mwaavara muteko muxavoni ya inyompe, okathi wo okhuma waka elapo ya vathi. Masi oxipiritaali, kahooveleelihani muhupi, ‘Mmuleele Bill wira sothene siri saana.’”

Kinoothapela wira, “Ayo, kaahaakhela muhupi anyu, mmathalani wu.”

⁷⁰ Nto, miyo kinona wira, voottharana animoorwa atithi aka. Awo yaari nlutte naattharenle orowa, ni . . . Nnari.

⁷¹ Kinoona wira Charles t’attharenle, muhima. Owo aaphwanye ehasara ya ekaaro okathi waaryaawe mwammiravo paahi. Owo kweeke apurulaka mwetto awe woolopwana, eettaka. Masi, moosuwela, okathi onrowaaka omoona, khonrowa opurulaka mwetto ole. Yothene enrowa omalamala, onrowa okhala mookaryani wa mmiravo.

⁷² Ni onoorowa okiirela, etthu sa, atheyaka. Owo onimwiira, “Ayo, Bill, khasikhanle ihasara osulu nno. Ni kinnuupuwela ohiyu kihinatthi okuxiwa muhasarani ya ekaaro, nyuwo mwaahilavula ni miyo, mweemenle vamukhora va empa ahu yaamukhaani ya wiiyeviha,” ni kinweha vasulu vaya, naanaano va. “Nyuwo mwaahilavula ni miyo sa Apwiya, iwoora vakhani paahi muhinatthi orowa. Ni nyuwo mwaari vapulpitu mulaleyaka okathi waakhumme aka.”

⁷³ Nuumala animoorwa apaapa. Oh, kinniwerya owoona. Anaamwi yahaareere okimana miwaxuxo, vekeekhai seiyo saakitthuna masi kinimoona ekulu ele ya maihi oonyokotowa ooripa, yaaryaxaka vahinatoko aya, nihiku nlo. Nto awo anookiweha, yiire, “Mwan’aka, moosuwela, Apaapa khankhalakhala-tho akhumaka vameesa va, avoliwe etala, wira yaahiye an’aya wira alye, maana nno khanireerane. Nno khenthowa-wo nnakhala.”

⁷⁴ Owoona okathi waavaraaya muteko, ni mwaha wa isentavo miloko mithanu wala miloko mithanu na miili ni khula nihiku, vano nto ovenya vameesa wira anamwane ewerye olya, otthikela-tho muteko. Ni khiyaareere ovara muteko mpakha ekamisa aya

yaavyaaya nsuwa mmakhatani mwaya, ni amaama yaanithikila ni etisoora wira ekakharule.

⁷⁵ Kinoowiiwa awo ohimya etthu ntoko ela, “Bill, munnuupuwela ohiy’ule nyuwo ni Munna George mwaarwiiyaanyu okivekelela okathi waarowaaka? Moosuwela, miyo kaahaalela amaama wira yaahikhala Malaikha maili oottelela waattamela olili, ni nlaikha nimosa nooxeerya munawoni. Nto nlaikha nooxeerya naaphavela okivara, masi Nlaikha noottelela naari eriyari. Vookiserya awo khukiroiha Owaani.”

⁷⁶ Nto, nave-tho, oottharela vanluteni oorowa, ahiiso oronwe, onrwa Howard. Kinoomoona Howard; moota neettakaahu hoothe mapuro naarowakaahu, mapuro othene; oowiiwthaniwa wira kikhale murumeyi; mutthu muulupale, masi axirikha awe khunvarelela. Olavula wookiserya kaarinaaka ni yoowo, owo iirale, “Miyo karowa-ru, Bill. . .”

⁷⁷ Miyo—miyo kaahimoona owo arowaka, ni yoowoona, miyaakha soophiyaka mixexe owo ohinatthi orowa. Khimuleela wira kaahiwoona Apaapa ophima ekhapuri awe ni wira t’ari oottharelana.

⁷⁸ Nto owo khwira, “Yookhala etthu emosa kintthunaaka wira mukiirele.” Owo khwira, “Miyo kootapanya makhalelo aka. Miyo koothela ni itthu sothene. Miyo—miyo nkisuwenle ekhumelenle.”

Miyo khwira, “Munnimwaamini Yoowo, Howard?”

⁷⁹ Owo khwira, “Ni sothene siri mwa miyo, miyo kinnimwaamini Owo.” Muhina mwa mahiku oophiyaka maili wala mararu owo ohinatthi orowa, owo aahikhalana murettele ni Muluku, ni Munna Neville n’akina iwe. Nto owo khwira, “Yookhala etthu emosa kintthunaaka wira mwiire. Karowa vale, Bill, mwaavekele wira akiipele, ‘Owo Onoosuwela, Ni Onimwiira, “Eri Saana.””

⁸⁰ Kookupali, kihinatthi ovahana ntata ni Howard, kinoomwiiwa owo weemela ni okiweha, ni wira, “Bill, Owo aahisuwela.”

⁸¹ Nuumala yeeyo, onimoorwa Munna Seward, Munna Frank Broy, Munna George DeArk. Oh, ohihimuwa onnihimya vanci-ene wa miyo. Kinniwehererya okathi ule muulupale wo owara ekhara. Vano nto okathi Waarya onipaceryaya omwareya, “Hiyo ninoosuwela ntoko sinsuweliwaahu.” Ninoosuwela saana, ni—ni ninoowuupuwela oosuweliwa ahu ni a—ale anrowa okhala weiwe.

⁸² Ni—ni anci-ene, anookhala anci-ene iwe hiyo hata nahuupuwelelaahu wira yaamukhala weiwe. Tthiri, moosuwela, p’ukathi yoowo, kinaamini aka wira “mukatthe orihelenlyahu mmaasini a atthu oowuutuwaneyya, onoonitthikela Nihiku nle.”

Noonaru eyiirelo ya onamoona ahu, mwa atthu nihisuwenlyahu yoowiira aya wa Yeela, alakela anrowa okhala weiwe. Nihiku xeeni ninrowa okhala nlo!

⁸³ Vano, nto, nave-tho, ipyo saanle-ahu, hata nihuupuwelaka etthu saarowaaya wira, masi iya siri va. Sooruuha mihokorokho sooreeraxa, ni hiyo nnimoona Nihiku nle, oophentiwa ahu a nthiti ni amusi.

⁸⁴ Ni kinniwuupuwela ikonto sene kiwoonalyaaka orukunxa murima, ayo, mwa imilyawu vano, evaraka muteko, ni ole waari muteko aya. Oh, enrowa okuxa ovikana ohihimuwa. Enrowa okuxa Ehimalelo, wira niviravire, nivahanaka matata ni kisuwelaka itthu kihinsuwelaaka vano.

⁸⁵ Anookhala aximaama ale oowuuluvala a maihi oottweelela, yaawo munaawarelaanyu itthutu iya sootteela olelo, anrowa owoonani, nto awo anrowa okhala ooreera. Oohooniheriwa ni mwaapu wa maluwa, wala elatarato emosa ya mutthu oowuuluvala a maihi oottweelela; masi oolikana ni oreera wa ohihimuwa, awo anrowa okhala oolikana ni Kristu, irutthu saya sa wirimu, amiravo ni ooreera voohimala. Vekeekhai, nlo ti—nlo ti Nihiku n'Aximaama kinlipelelaaka. Iwo ti owarihiwa ekhara. Kahi epharihelo ya elapela, masi owarihiwa ekhara wa munepa, tthiri Muluku oorukunxa!

⁸⁶ Miyo kiniwuupuwela ame aka yoomi, oowuuluvala ni oowooceya, ni ethukumelaka ni nanttethe. Awo khanrowa wiiraka eyo Nihiku nlo. Enrowa okhala yoovirikana nto. Ni Waarya iwe wuulupale onapacerya omwareya, okathi ompacery'ahu owehaweha, nto nreko nuulupale ninrowa okhalaka ninnuwaka ni ninnuwaka ni ninnuwaka. Sothene sinooniherya waattamela wa Yesu paahi. "Nto nuuvira okathi vakhani," ntoko nsipo nihimalyaya, "nto vookiserya kinoomoona Yesu."

Owo onrowa okilipelelaka, Yesu, ooreera murima ni oororomeleya.

Veehicensi Vawe vooreera Owo onookiihanela vooreera Owaani

Namala-ru nihiku nla.

⁸⁷ Vano namoona-ru Owo, ni khaninrowa okhala ntoko siry'ahu vano. Ninoorowa—ninoorowa osuwela moota wo omphentaxa Owo. Khaninrowa otthikela ottuli ni woova vakhani; okhala wira, ninrowa okhala ntoko Yoowo. Hiyo...Owo onrowa okhalaxa mmusi wa hiyo ovikana siry'awe vano. Ninoorowa omwiiwa oratteene. Okhala wira, hiyo khanireere okhala ottaiwene, mw'erutthuni sinkhwa; vano ninrowa okhalana erutthu ntoko erutthu Awe ya ntittimiho. Hiyo ninoosuwela moota w'omukokhorela Yoowo. Ni noona-ru etthu Mukhalelo wa Omutthu Awe oniirihalyaya, onirukunxa, oowuuluvala okhala

mmiravo, othene oohononeya wookololiwa, oh, ninoosuwela saana nto mwaha wa xeeni owerya Wawe okelaka onivoniha.

⁸⁸ Soohoverya siri mmuupuweloni mwahu, “Onwerya sayi Owo wira? Ankhi *ela*?” Mwa enamuna emosa, mwa mwiirirya, sothene iyo sinoolakaseya. Malutte athhukiwe ottuli wa miyuupuwelo sahu, “Enookhala ela? Vaaweryaneya sayi okhala?” Mwa enuma emosa, wala ekina, ikatha sa emwene sinimooniherya, sinootaphula malutte awo, nto sothene sinoolakaseya sipakeye ekhara yuulupale ya ophenta.

⁸⁹ Vano ninoomoona Owo. Nto ninookhala ntoko Yoowo. Vano ninoomukokhorela Yoowo. Vano ninoowona amaama ntoko Muluku sinaatthunaawe.

Amaama khanrowa okhala oomalela Iwe ahirina amusi aya.

⁹⁰ Okhala wira, okathi muulupalexa wa ekumi aya yothene owoona aana erukurenrye meesa, ni othene aya arina ekumi ni ootthapa; ni—ni—ni owoona oyeehi ekafe, wala etthu p’itthu aniiraaya, ni waapeya yolya y’ohiyu, nto awo ni apaapa okilaathi. Vano, owo p’ukathi woohakalalaxa mwa makhalelo a maama, owoona an’awe othene owaani.

⁹¹ Vano, muhialele, muhialeleke okhala Nihiku nle. Nikwicili nuulupale na emusi anyu ekweecane, nlutte ni nlutte. Khula eraayi ekhale murootani. Vano nakilaathi-ru ni amusi ahu ni makhuru, musulu mwa Ehimalelo, Nihiku xeeni ninrowa okhala nle! Nto ninoosuwela.

⁹² Ti Yoowo olaihenrye ela, mwa Wiisuupulula 1, vaavo Eyo ehimyaaya wira, wira, “Xoowa oniitha ninno ni nno aahikhuma mwaaano Mwawe.” “Owo iitthaniwa Masu a Muluku.” Ni yaari mwa iyano imosaru seiyo, sihimmye wira, “Miyo ka Yoole kinkhala, kaakhwiye; ni ka mukumi voohimala.” Mwa iyano seiye imosaru, mwa Yohani Oowaarya 6, miloko miraru ni- . . . onihimya ela, wira, “Khanrowa okipweteya, masi kinoonvenxa-tho mahiku ookiserya.” Ti Yoowo omulampe natiri; iyano iye sooreeraxa. Owo ti Ole onnoopola, Ole onnivoniha, Ole onivulunxe, ni Ole onrowa onihihimuxa nihiku nookiserya.

⁹³ Nyuwo mwakhala nlutte nle nootteettheya munvalaanihaka okumana nno wuulupale wa amusi Nihiku nle, Muluku a Wirimu, voosiis’ula, mwa enamuna emosa mwa enamuna ya mwiirirya, ataphule malutte ale makhaani athhukiwe mmuupuweloni mwanyu, ni owuupululeleni ophenta Owo orinaawe wa nyuwo, ni wira murwe voosivela wira mmurumeele Yoowo.

Nuupuwelaka itthu iya, nrowe nivekele.

⁹⁴ Vakhani nihinatthi ovekela, ni nyuwo mukhale ni muru anyu wowuurama, kinrowa wookohani. Mwaamutthuna, Nihiku nla n’Aximaama, ovahererya-tho vasya makhalelo anyu wa Yoowo,

niwehaka ohoolo woohihimuwani iwo? Mwaamunvenxerya matata Yoowo? Okathi khula mmosa . . . Muluku ooreeriheni.

⁹⁵ Aamukhala natampi ori vaava naanaano va, aarowa wira, “O Muluku, miyo nlelo nkinatthi wiithukwanyanya vanlutteni vale. Miyo ka ole orimeenle aahaarowa okhala iwe okathi amaama yaarowaaya owehaweha Movuwani mothene. Nkinrowa okhala iwe, maana nlelo nkinatthi okhalana murettele ni Muluku. Miyo nkirina nrromelo wa Ekumi Ehinimala mwa miyo. Masi olelo miyo—miyo kintthuna wira yeeyo?” Munnitthuna ovenxa ntata, mwiire, “Mukivekelele, Munna Branham, naanaano va. Kintthuna kuupuweliwe mmavekeloni, maana kookhalana oophentiwa aka epannte ekina y’ephareya, ephareya ya Ekumi, ni kintthuna okumana ni yaawo?” Nvenxe matata.

⁹⁶ Wala mutthu oihulunxe, ni aatthuna otthika nihiku nla, ni wira, “Pwiya, kinnivahererya-tho ekumi aka vasya wa Nyuwo; kinrwa wuuluula mwaataano aka ni Nyuwo,” mwaamunvenxa matata anyu?

⁹⁷ Tith’ihu a Wirimu, naattamelaka, nihiku nla ninookhaliha nihiku nimoso vakhiviruxa wa yookhumelela ele. Ni ninnikhalaka ookhanyereriwa paahi, khula mwaakha, woona ela yooniheriwaka.

⁹⁸ Ntoko atthu yaarowakaaya oYerusalemu Nihiku na Pentekosite, ni wa oreerihwa wa empa moolompa-mo ni empa yooreerihwa y’okokhorela, ni—ni ovaha mukuttho mwaha wa etampi, khula mwaakha awo yaanuupuxeriwa, okathi mwaapwittipwitthi ule aakhwaawe vate vale, wira waamphiya okathi Mwaapwittipwitthi a Muluku aarowaawe okhwa, wira amwalanihe etampi. Khula okathi mwaamunama ole aanlaawe, ni ephome enavuwa mmatatani mwaya, awo yaanuupuxeriwa wira waamukhala okathi aarowaawe okhala Mwaapwittipwitthi a Muluku, aarowa wunla, “Eli, lama . . . ? Eli, lama . . . ?” vamwiikimanyo.

Miyo kinvekela, Muluku, wira ntoko ninwehaahu olelo ni woona wira . . .

⁹⁹ Isumana vakhani sivinre, kihinatthi okhuma mmutekoni mw’Anyu, kirowaka oCalifornia, Indiana ola khaarina mataakhuru ni ookhwa, ni khiyaakhanle ekumi, wooneya wene. Maluwa yaahikhwa ephovo yookiserya. Mataakhuru yaahimora mmirini. Ni ephwamwaasi mmirini yaahirowa mmitathaarini, ni itthu sothene saahikhwa.

¹⁰⁰ Masi waahikhala okathi nsuwa naapaceny’aya waarya mwa enamuna yoovirikana. Nsuwa nimosaru naaryale mwiita wothene, masi itthu saahirukunuwa ni naarya voovirikana. Ni mwaha wo waarya wa nsuwa, ni itthu, ekumi yaahiphuwa, mapuro othene. Mataakhuru yaahitthikela mmirini. Ntaakhuru . . . Ekumi yaahiyale ntaakhuru, nto ntaakhuru khumora, masi ekumi khurova vathi; eyo yaahitthika

ni oreera musya, mookaryani wa emiravo. Ethutu yaapwetenxe eyu—eyunkhelo aya, yaapwetenxe oreera waya woocerimela khumorela vatthayani; yaahiyariwa, khuphuwa-tho mwa emiravo aya, ni eyunkhelo esya.

Ninuupuxeriwa exeeni, Pwiya, iwoora iya?

¹⁰¹ Ni olumwenku onkhala ethako, yoonyoonyiwa yoowuuma, ekhalaka eparatiiso ya oreera, ni enwi ni axipalame yipaka, ni sothene sootthapa, ni miri si—sithweelaka mutthekuni mwa eriiryelo ya ohakalala wa ephovo. Oviha ni otthapa saari-tho mulaponi, mwaha wa nsuwa, n-s-u-w-a.

¹⁰² Masi nihiku nimosa M-w-a-a-n-a onimoorwa ni ovoniha mmapuphani Mwawe, nto ikumi iye sikhaani siipinthe ntoko ephwamwaasi mmwirini, vathi, ntoko e—ekumi eri mw'epyoni ya nluwa, enooruhela osya emaara ekina, wira ehinyaale-tho. Oh, moota onooxukhuru-ahuni Nyuwo mwaha wa yeela!

¹⁰³ Ni yaahikhala manci-ene, matata manci-ene yaavennyee voosiis'ula, maana annisuwela wira epantte ekina y'ekuwo iwe, yookhala etthu. Awo anthuna omoona maama. Awo anthuna owoona oophentiwa aya ni oowaasuwela aya, n'usuwela isiiri iya sothene, moota awo apiyale aya va, ni moovirani w'okathi. Yothene eyo eri ottuli w'ekuwo yiipithihiwe. Ni nihiku nlo Nyuwo munimoorwa. Ni awo aavenxa matata; awo—awo—awo—awo anthuna okupali, Pwiya. Awo animwiisuuluula-tho mmansaya, nave ni miyo. Vano munikhaliherye, Pwiya. Muuuluule waamini wahu ni ikuru sahu.

¹⁰⁴ Ni noonaka waattamela w'Apwiya. Ni miyaakha miloko mixexe sookiserya, ookhumelela pentekosite musya mulaponi. Eroho khupacerya wuupulula ithu. Nto hiyo nri va veethoonyeryo yookiserya, okathi vakhani ohinatthi Orwa. Hiyo noosuwela wira orwa w'Apwiya ori vakhiviru. Ni ninniwoona aretta evonihiwaka iretta saya, yeeyo enkhalaka mwiiriirya wa olumwenku, mwa miyaakha ikonto piili, okhuma arummwa. Masi va enimoorwa-tho, maprofa akhumelelaka, Malaikha anookhumelela, ithoonyeryo ni mitikiniho. Exeeni iyo? Ohihimuwa onookhuveela. M-w-a-a-n-a onimoorwa.

¹⁰⁵ Nikhale oolikana, Pwiya. Munihiye nimpatikhe khula natiri a Muluku; ni huupuwele malutte ala makhaani athukumanyiwe ni siyensiya, ni siiso, wira khekhanle wiireyaka. Epacerye wiitaphula, voosiis'ula, mwa ele ehinkhwa. . . [Nipuro vahiithu mufiitani—Mol.] . . . okathi Owo onthukumelaawe mwa Masu a Bibilia a Muluku, ntoko ekaruma yookokhiwa saana, wira yoope erumelo, “Miyo ka Yoole aakhwiye, ni onkhala voohimala-tho.” “Woohala okathi vakhani, nto olumwenku khunrowa-tho okoona; masi nyuwo munookoona.” “Maana Miyo kinookhala ni nyuwo, hata mwa nyuwo, mpakha omala olumwenku.” “Vano enimwiiraneya mahiku ookiserya, onihimya ti Muluku, wira Miyo kinimwaamwaraxela Eroho Aka athu othene;

ithoonyeryo ni mitikiniho; anakhulu anooloha, ni amiravo animoona soowoona,” ethoonyeryo y’epula yookiserya ni okathi wookiserya. Eyo yooniwe eriyari ahu, voosiis’ula, Pwiya, ni wira waamini wahu okhale woolipihiwa. Maana hiyo ninvekela mwa Nsina na Yesu. Amen. 🕊

59-0510M Nihiku n'Aximaama
Branham Tabernacle
Jeffersonville, Indiana wAmerika

EMAKHUWA

©2025 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Olopola mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinvwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitumihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®. Mwaaphavelaka wiiwa-tho wala ikaruma sikina sikhhanle, xontte mulavule ni:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org